

知道欽此

署兩廣總督岑等會奏收復羅城縣城剿匪獲勝請獎尤爲出力各員摺

竊照三防股匪於八月十四日竄踞羅城縣城飭署右江道龍濟光督營收復並於小長安一帶兩次追剿獲勝先經臣等摘要電 奏聲明在事出力人員另摺請獎在案當八月初三日匪陷三防分股下竄前敵各軍被匪阻隔轉在賊後臣春煊適在慶遠屬之濟字營馳往援剿詎兵未發而悍匪歐四白毛七等率黨二千餘圍攻羅城縣城署知縣李澤先率練兵出外防剿衆寡不敵死傷過半十四早匪由城東南隅攻入城遂失陷時龍濟光所帶各軍尙未調集即先率兩哨及餘卒二百人星夜馳赴羅城自十五夜戰至十七辰刻始奪回城外潘羅兩村及硯山獅子山而匪由黃金龍岸一帶來會者不下七八千人龍濟光督隊晝夜苦戰二十二三日調濟營及慶防副中營陸續趕到二十五晚龍濟光重懸賞銀激勵將士派濟字選鋒營扼城外鳳凰山分隊進攻西門又派前營由城東南隅進攻派濟字右營副中營慶防副中營及奏革知縣李澤督率練兵由南門進四路衝突忍死血戰斃匪約三百餘人至二十六日黎明各營進抵城下龍濟光親率附生楊漢蒙錫麻奮力進攻一鼓登城遂將羅城縣城收復匪由東門奔竄小長安龍濟光卽飭李澤先入城安撫百姓一面

分兵尾追一面自率健卒繞出小長安之前遏匪去路臣等聞報飛飭右江營務處道員王芝祥督率成字營銘字營熙字營柳防營前進要截九月初三日各營會合濟軍在羅城融縣柳城交界之王村一帶與匪猛撲斃匪三百餘名次日又分路進攻分統成字營守備劉成貴追匪至融羅交界之牛鼻河口溺死槍斃者共百餘人濟字營攻破小長安匪巢殲匪倍之匪勢大敗伏查龍濟光自去冬帶濟字四營由滇赴百色泗城一帶剿辦游土各匪半年以來地方漸臻靜謐本年五月委署右江道篆並令添募四營先辦慶遠各屬行經河池思恩等州縣遇匪即擊均有斬擒節經隨時奏報甫抵慶郡遂援羅城每戰必親自督陣不避艱險所部營員亦多驍勇此次苦戰旬日稟報陣亡什勇約百餘名亦足徵匪徒之狡悍攻剿之不易道員王芝祥督催各軍要截赴機亦極迅速守備劉成貴兩次攻匪衝鋒剿疾殺賊百餘名極爲奮勇當此匪勢未靖兵力多疲若不將異常出力各員立請優獎無以鼓勵戎行合無仰懇 天恩俯准將委署右江道統領濟字營花翎鹽運使銜貴州補用知府龍濟光免補本班以道員留於廣西補用並 賞加二品頂戴附生蒙錫麻楊漢均以巡檢分省前先補用分統成字營補用守備劉成貴管帶濟字前營補用守備龍得勝均免補本班以都司儘先補用並加遊擊銜管帶濟字選鋒營千總白有祿幫帶千總白志城均免補

軍 事

四十六

二月

千總以守備儘先補用並加都司銜幫帶濟字右營把總納順洪管帶濟字副中營把總李文富均免補把總千總以守備儘先補用以上請保文武僅止九員確無冒濫謹 奏奉 硃批著照所請該部知道欽此

江西巡撫夏奏江西內河水師換造船隻並酌改營制餉章摺

竊江西內河水師經前護撫臣柯逢時添造飛划改爲巡警軍臣到任後又分爲左右兩軍先後具 奏並聲明營制餉章畧爲增損在案茲查該兩軍船隻原有舊式長龍三號督陣舢板四號長江舢板六十四號舊式舢板二十號共船九十二號續添飛划九十一隻向章三年小修六年大修九年小修十二年換造惟自光緒十一十二兩年換造後至二十三四年等均屆換造之期因經費支絀改爲大修二十七八等年亦經陸續修理而自造成以來爲時近二十年木質朽敗釘腳鬆銹隨修隨壞不堪操練駕駛且旣分屬兩軍各項船隻數目亦宜酌量變通以期適合於用據該兩軍統領稟經批飭派辦政事處司道核議卽於三十年一律換造左右兩軍共改設長江長龍兩號舊式長龍四號督陣舢板二號長江舢板七十六號舊式舢板六號共計大小船隻九十號巡划九十隻所需工料及設廠經費核實支用造銷至營制及統領營哨等官弁薪工亦做照常備續備各軍酌量核定詳請具 奏